

攝大乘論

二冊

中

二百四十五  
日九

49223



攝大乘論卷中九

陳天竺三藏真諦於廣州譯

應知勝相第二之二



若唯識似塵顯現依止說名依他性云何成  
依他何因緣說名依他從自熏習種子生故  
繫屬因緣不得自在若生無有功能過一刹

那得自住故說名依他若分別性依  
無所有似塵顯現云何成分別何因緣說名  
分別無量相貌意識分別顛倒生因故成分



別無有自相唯見分別故說名分別若真實  
性分別性永無所有為相云何成真實何因  
緣說名真實由如無不如故成真實由成就



清淨境界由一切善法中最勝於勝義成就  
故說名真實復次若有分別及所分別分別  
性成此中何法名分別何法所分別何法名  
分別性意識是分別具三種分別故何以故  
此識自言熏習為種子及一切識言熏習為  
種子是故此生由無邊分別一切處分別但  
名分別說名分別此依他但是所分別是因  
能成依他性為所分別此中名分別性云何  
分別能計度此依他性但如万物相緣何境  
界執何相貌云何觀見云何緣起云何言說  
云何增益由名等境界於依他性中由執著  
相由決判起見由覺觀言說緣起由見等四

種言說實無有塵計實有爲增益由此因故  
能分別此三種性云何與他爲異爲不異非  
異非不異應如此說有別義依他性名依他  
有別義此成分別有別義此成真實何者別  
義說此名依他從熏習種子生繫屬他故復有  
何義此成分別此依他性爲分別因是所分  
別故成分別復有別義此成真實此依他性  
或成真實如所分別實不如是有故復有何  
義由此一識成一切種種識相貌本識識所  
餘生起識種種相貌故復因此相貌生故依  
他性有幾種若略說有二種一繫屬熏習種  
子二繫屬淨品不淨品性不成就是故由此

二種繫屬說名依他分別性亦有二種一由  
分別自性二由分別差別真實性亦有二種  
一自性成就二清淨成就復有分別更成四  
種一分別自性二分別差別三有覺四無覺  
有覺者能了別名言衆生分別無覺者不能  
了別名言衆生分別復次分別有五種一依  
名分別義自性譬如如此名目此義二依義分  
別名自性譬如如此義屬此名三依名分別名  
自性譬如分別未識義名四依義分別義自  
性譬如分別未識名義五依二分別二自性  
譬如如此名此義何義何名若攝一切分別復  
有十種一根本分別謂本識二相分別謂色

等識三依顯示分別謂有依止眼等識識四  
相變異分別謂老等變異苦樂等受欲等惑  
及在時節等變異地獄等欲界等變異五依  
顯示變異分別謂如前所說變異起變異分  
別六他引分別謂聞非正法類聞正法類分  
別七不如理分別謂正法外人非正法類分  
別八如理分別謂正法內人聞正法類分別  
九決判執分別謂不如理思惟種類身見爲  
根本與六十二見相應分別十散動分別謂  
菩薩十種分別無有相散動有相散動增益  
散動損減散動一執散動異執散動通散動  
別散動如名起義散動如義起名散動爲對

治此十種散動分別故於一切般若波羅蜜  
教中佛世尊說無分別智能對治此十種散  
動應知具足般若波羅蜜經義如般若波羅  
蜜經言云何菩薩行於般若波羅蜜舍利弗  
是菩薩實有菩薩不見有菩薩不見菩薩名  
不見般若波羅蜜不見行不見不行不見色不  
見受想行識何以故由自性空不由空空見色空  
非色無色異空故色即是空空即是色何以故舍  
利弗此但有名所謂色是自性無生無滅無染無  
淨對假立名分別諸法由假立名隨說諸法如  
如隨說如是如是生起執著如此一切名菩薩不  
見若不見不生執著如觀色乃至識亦應作如此



觀由此般若波羅蜜經文句應隨順思惟十  
種分別義若由此別意依他性成有三性是  
三性云何性有三異不成相雜無相雜義由  
此道理此性成依他不由此成分別及真實  
由此道理此性成分別不由此成依他及真  
實由此道理此性成真實不由此成依他及  
分別云何得知此依他性由分別性顯現似  
法不與分別性同體未得名前於義不應生  
智故法體與名一則此義相違由名多故若  
名與義一名既多義應成多此義體相違由  
名不定體相雜此義相違此中說偈  
於名前無智 多名及不定 義成由同體

多雜體相違

法無顯似有

無染而有淨

是故譬幻事

亦以譬虛空

云何如此顯現而實非有依他性一切種非  
不有若無依他性真實性亦無一切無不成  
若無依他性及真實性則有無染汙及清淨  
品過失此二品可知非無是故非一切皆無

此中說偈

若無依他性

真實性亦無

則恒無二品

謂染汙清淨

諸佛世尊於大乘中說鞞佛略經此經中說  
云何應知分別性由說無有品類此性應知  
云何應知依他性由說幻事鹿渴夢相影光

影響水月變化如此等譬應知其性云何應  
知真實性由說四種清淨法應知此性四種  
清淨法者一此法本來自性清淨謂如如空  
實際無相真實法界二無垢清淨謂此法出  
離一切客塵障垢三至得道清淨謂一切助  
道法及諸波羅蜜等四道生境界清淨謂正  
說大乘法何以故此說是清淨因故非分別  
清淨法界流故非依他由此四種清淨法攝  
一切清淨法皆盡此中說偈  
幻等顯依他 說無顯分別 若說四清淨  
此說屬真實 清淨由本性 無垢道緣緣  
一切清淨法 四皆攝品類

何因何緣是依他性如經所說幻事等譬所  
顯於依他性中爲除他虛妄疑惑云何他於  
依他性中生虛妄疑惑諸說於依他性中有  
如此虛妄疑心若實無有物云何成境界爲  
決此疑故說幻事譬若無境界心及心法云  
何得生爲決此疑故說鹿渴譬若實無塵愛  
非愛受用云何得成爲決此疑故說夢相譬  
若實無法善惡二業愛非愛果報云何得生  
爲決此疑故說影譬若實無法云何種種  
智生爲決此疑故說光影譬若實無法云何  
種種言說起爲決此疑故說谷響譬若實無  
法云何成緣真實法定心境界爲決此疑故

說水月譬若實無法云何諸菩薩故作心無  
顛倒心爲他作利益事於六道受生爲決此  
疑故說變化譬婆羅門問經中言世尊依何  
義說如此言如來不見生死不見涅槃於依  
他性中依分別性及依真實性生死爲涅槃  
依無差別義何以故此依他性由分別一分  
成生死由真實二分成涅槃阿毗達磨脩多  
羅中佛世尊說法有三種一染汙分二清淨  
分三染汙清淨分依何義說此三分於依他  
性中分別性爲染汙分真實性爲清淨分依  
他性爲染汙清淨分依如此義故說三分於  
此義中以何爲譬以金藏土爲譬譬如於金

藏土中見有三法一地界二金三土於地界  
中土非有而顯現金實有不顯現此土若以  
火燒鍊土則不現金相自現此地界土顯現  
時由虛妄相顯現金顯現時由真實相顯現  
是故地界有二分如此本識未爲無分別智  
火所燒鍊時此識由虛妄分別性顯現不由  
真實性顯現若爲無分別智火所燒鍊時此  
識由成就真實性顯現不由虛妄分別性顯  
現是故虛妄分別性識即依他性有二分譬  
如金藏土中所有地界復次有處卍尊說一  
切法常住有處說一切法無常有處說非常  
非無常依何義說常此依他性由真實性分

常住由分別性分無常由二性分非常非無  
常如依此義說常無常無二如此說苦樂無  
二善惡無二空不空無二有我無我無二靜  
不靜無二有性無性無二有生無生無二有  
滅無滅無二本來寂靜不寂靜無二本來涅  
槃非涅槃無二生死涅槃無二由如此等差

別諸佛如來依義密語由此三性應隨決了  
常無常等正說如前解釋此中說偈

如法實不有 如彼種種現 由此法非法

故說無二義 依一分說言 或有或非有

依二分說言 非有非非有 如顯現不有

是故說永無 如顯現實有 是故說非無

由自體非有

自體不任故

如取不有故

三性成無性

由無性故成

前爲後依止

無生滅本靜

及自性涅槃

復次有四意四依一切佛世尊教應隨決了

一平等意譬如說昔是時中我名毗婆尸

久已成佛二別時意譬如說若人誦持多

寶佛名決定故無上菩提不更退墮復有說

言由唯發願得安樂佛土得往彼受生三別

義意譬如說事如是等恒伽所有沙數諸

佛於大乘別義得生覺了四衆生樂欲意譬

如如來先爲一人讚歎布施後還毀訾如施

戒及餘修亦亦是名四種意四依者一令入



依譬如於大小乘中佛世尊說人法二種通  
別二相所攝俗諦二相依譬如隨所說法相  
中必有三性三對治依此中八万四千衆生  
煩惱行對治顯現四翻依此中由說別義言  
詞以顯別義譬如偈言

阿娑離婆羅摩多耶

毗跋耶斯者修締多

離施那者僧柯履多

羅槃底菩提物多摩

若人欲廣解釋大乘法略說由三相應當如  
此解釋一廣解緣生體相二廣解依因緣已  
生諸法實相三廣解成立所說諸義廣解緣  
生體相者如偈說言熏習所生諸法此從彼  
如此果報識及生起識由更手因生等解釋

依因緣已生諸法實相者諸法者謂一起識  
為相有相及見識為自性復次諸法依止為  
相分別為相法亦為相由此言說於三性中  
諸法體相則得顯現如偈言

從有相有見 應知法三相

云何得解說此法相分別性於依他性實無  
所有真實性於中實有由此二不有有故非  
得及得未見已見真如一時自然成於依他  
性中分別性無故真實性有故若見彼不見  
此若不見彼即見此如偈言

依他中分別 無但真實有 故不得及得

於中二平等

廣解成立所說諸義者譬如初所說文句由  
所餘諸句顯示分別或由功德依止或因事  
義依止功德依止者廣說佛世尊功德最清  
淨慧無二行無相法為勝依意行住於佛住  
至得諸佛平等行無礙行不可破無對轉法  
不可變異境不可思惟所成立法至三世平  
等於一切世界現身於一切法智慧無礙一  
切行與智慧相應於法智無疑不可分別身  
一切菩薩所受智慧至無二佛住波羅蜜至  
無差別如來解脫智究竟已得無邊佛地平  
等法界為勝虛空界為後邊最清淨慧如此  
初句由所餘句次第應知分別解釋若如此

正說法義得成最清淨慧者諸佛如來智慧  
於一切法清淨無不了別如此本義應知由  
二十一佛功德所攝於所知一切無障行起  
功德於有無無二相真如最清淨令入功德  
不由功用不捨如來事佛任功德於法身依  
止及意事無差別功德修習一切障對治功  
德降伏一切外道功德生於世間非世間法  
所染汙功德安立正法功德四種善巧答他  
問功德於一切世界中顯現應化身功德能  
使他疑功德由種種行能令他入功德於未  
來世法生智功德隨衆生樂顯現功德能行  
無量依止衆生正教化事功德平等法身波

羅蜜成就功德隨衆生意顯現純淨佛土功德是三種佛身無離無別處功德窮生死際能生一切衆生利益安樂功德由無盡功德因事義依止者如經言若菩薩與三十二法相應說名菩薩於一切衆生與利益安樂意相應令入一切智智意我今於何處忠當相應如此智捨高慢心堅固善意非假作憐愍意不貪報恩於親非親所平等意永作善友意乃至無餘涅槃稱量談說歡笑先言於諸衆生慈悲無異於所作事無退弱心無厭倦心聞義無足於自作罪能顯其過於他作罪不恠訶責於一切威儀中恒持菩提心不求

果報而行布施不著一切怖畏及道生受持  
禁戒於一切衆生忍辱無礙為引攝一切善  
法行於精進修三摩提滅離無色定與方便  
相應智四攝相應方便於持戒破戒中善友  
無二事善知識恭敬心聽法恭敬心樂任阿  
蘭若處於世間希有不生安樂心於下品乘  
不生喜樂心於大乘教觀實功德遠離惡友  
敬事善友恒持四種梵任持無量心清淨恒  
遊戲五神通恒依智慧行於任正行不任正  
行衆生無捨離心引攝大衆一向決定言說  
恭敬實事先恭敬行菩薩心與如此等法相  
應說名菩薩由如此文句前說初句應知解

說初句者謂於一切衆生利益安樂意此利  
益安樂意文句別有十六文句所顯業應知  
解說十六業者一傳傳行業二無倒業三不  
由他事自行業四不可壞業五無求欲業有  
三句解釋應知不貪報恩有恩無恩衆生不  
生愛憎心隨順行乃至餘生隨處相應言說  
業有二句解釋應知有苦有樂無二衆生平  
等業無下劣業不可令退轉業攝方便業厭  
惡所對治業有二句解釋應知無間思量業  
行進勝位業有七句解釋應知正修加行六  
波羅蜜恭敬行四攝成就方便業有六句解  
釋應知事善知識聽聞正法住阿蘭若處遠

離邪覺觀正思惟功德有二句顯事善友功  
德有二句顯成就業有三句解釋應知治無  
量心清淨得威德證得功德安立他業有四  
句解釋應知引攝大衆無疑心立正教學處  
法財二攝無染汙心如此等句應知解釋初  
說文句此中說偈

取如前說句

隨德句差別

取如前說句

由義別句別

攝大乘論應知入勝相第三

如此已說應知勝相云何應知應知入勝相  
多聞所熏習依止非阿黎耶識所攝如阿黎  
耶識成種子正思惟所攝似法及義顯相所



生似所取種類有見意言分別何人能入應  
知相大乘多聞熏習相續已得承事無量出  
世諸佛已入決定信樂正位由善成熟修習增  
長善根是故善得福德智慧二種資糧諸菩  
薩於何處入唯識觀有見似法義顯相意言  
分別大乘法相所生於願樂行地入謂隨聞信

樂故見道謂如理通達故修道謂能對治一  
切障故究竟道中一切法實唯有識如說隨  
聞信樂故如理通達故能對治一切障故出  
離障垢最清淨故云何得入由善根力持故  
由有三相鍊磨心故由滅除四處障故緣法  
義為境無間修恭敬修奢摩他毗鉢舍那無

放逸故十方世界無數量故不可數量在人  
道衆生刹那刹那證得無上菩提是名第一  
練磨心由此正意施等諸波羅蜜必得生長  
是我信樂已得堅任由此正意我修習施等  
波羅蜜進得圓滿則為不難是名第二練磨  
心若人與衆善法相應後捨命時於一切受  
生中可愛富樂自然而成是人得有礙善此  
義尚應成云何我得圓滿善及無礙善一切  
如意可愛富樂而當不成是名第三練磨心  
此中說偈  
人道中衆生 念念證菩提 處所過數量  
故無下劣心 善心人信樂 能生施等度

勝人得此意 故能修施等 若善人死時

即得勝富樂 滅位圓淨善 此義云何無

由滅除四處故由捨離聲聞獨覺思惟故邪

思惟滅於大乘中生信心及決了心故滅一

切邪意及疑是所聞思諸法中捨離我及我

所邪執故是故滅除法執安立現前任一切

相思惟悉不分別是故能滅除分別此中說偈

現任及安立 一切相思惟 智人不分別

故得無上覺

緣法及義為境何因何方便得入由聞熏習

種類正思惟所攝顯現似法及義有見意言分

別故由四種尋思謂名義自性差別假立尋思

由四種如實智謂名義自性差別如實智四  
種不可得故若菩薩已入已解如此等義則  
修加行為入唯識觀於此觀中意言分別似  
字言及義顯現此中是字言相但意言分別  
得如此通達此義依名言唯意言分別亦如  
此通達此名義自性差別唯假說為量亦如  
此通達次於此位中但證得唯意言分別是  
觀行人不見名及義不見自性差別假說由  
實相不得有自性差別義已由四種尋思及  
四種如實智於意言分別顯現似名及義得  
入唯識觀於唯識觀中入何法如何法得入  
但入唯量相見二法種種相貌名義自性差

別假說自性差別義六種相無義故由此能  
取所取非有爲義故一時顯現似種種相貌  
及生故譬如閻中藤顯現似蛇猶如於藤中  
蛇即是虛實不有故若人已了別此藤義先  
時蛇亂智不緣境起即便謝滅唯藤智在此  
藤智由微細分析虛空無實境何以故但是  
色香味觸相故若心緣此境藤智亦應可滅  
若如此見已伏滅六相顯現似名及義意言  
分別塵智不生譬如蛇智於伏滅六相義中  
是唯識智亦應可伏滅譬如藤智由依真如  
智故如此菩薩由入似義顯現意言分別相  
故得入分別性由入唯識義故得入依他性

及云何得入真實性若捨唯識想已是時意  
言分別先所聞法熏習種類菩薩已了別伏  
滅塵想似一切義顯現無復生緣故不得生  
是故似唯識意言分別亦不得生由此義故  
菩薩唯任無分別一切義名中由無分別智  
得證得任真如法界是時菩薩平等平等能  
緣所緣無分別智生由此義故菩薩得入真  
實性此中說偈

法人及法義 性略及廣名 不淨淨究竟

十名差別境

如此菩薩由入唯識觀故得入應知勝相由  
入此相得入初歡喜地善通達法界得生十

方諸佛如來家得一切衆生心平等得一切  
菩薩心平等得一切諸佛如來心平等此觀  
名菩薩見道

復次何故菩薩入唯識觀由緣極通法爲境  
出世奢摩他毗鉢舍那智故由無分別智後  
所得種種相識爲相智故爲滅除共本阿黎  
耶識中一切有因諸法種子爲生長能觸法  
身諸法種子爲轉依爲得一切如來正法爲  
得一切智智故入唯識觀無分別智後所得  
智者於本識及所生一切識識及相識相中  
由觀似幻化等譬自性無顛倒由此義故菩  
薩如幻師於一切幻事自了無倒於一切相

因緣及果中若正說時常無偏倒

是時正入唯識觀位中有四種三摩提是四種  
通達分善根依止菩薩云何應見由四種尋  
思於下品無塵觀忍光得三摩提是暖行通  
達分善根依止於最上品無塵觀忍光增三  
摩提是頂行通達分善根依止於四種如實  
智菩薩已入唯識觀了別無塵故正入真義  
一分通行三摩提是隨非安立諦忍依止此  
三摩提最後刹那了伏唯識想轉名無間三  
摩提應知是世第一法依止四種三摩提是  
菩薩入非安立諦觀前方便若菩薩如此入  
因緣已得見道得通達入唯識云何菩薩修



習觀行入於修道如佛廣說所安立法相於  
菩薩十地由攝一切如來所說大乘十二部  
經故得現前由治所說通別二境由生起緣  
極通境出世無分別智及無分別智後所得  
奢摩他毗鉢舍那智由無量無數百千俱胝  
大劫中依數數修習由昔及今所得轉依爲  
得三種佛身更修加行是聲聞見道是菩薩  
見道此二見道差別云何聲聞菩薩見道應  
知有十一種差別何者爲十一一由境界差  
別謂緣大乘法爲境二由依止差別謂依大  
福德智慧資糧爲依止三由通達差別謂通  
達人法二無我四由涅槃差別謂攝無任處

涅槃以爲任處五由地差別謂依十地爲出  
離六七由清淨差別謂滅煩惱習氣及治淨  
土爲清淨八由於一切衆生得平等心差別  
謂爲成熟衆生不捨加行功德善根九由受  
生差別謂生如來家爲生故十由顯現差別  
謂於佛子大集論中常能顯現爲攝受正法  
十一由果差別謂十力無畏不共如來法及  
無量功德生爲果故此中說兩偈

名義牙爲客

菩薩應尋思

應觀二唯量

及彼二假說

從此生實智

離塵分別三

若見其非有

得入三無性

又正教兩偈如分別觀論說

菩薩在靜位

觀心唯是影

捨離外塵相

唯定觀自想

菩薩住於內

入所取非有

次觀能取空

後觸二無得

復有大乘莊嚴經論所說五偈為顯此道

菩薩生長福及慧

二種資糧無量際

於法思惟心決定

能了義類分別因

已。知義類但分別

得住似義唯識中

故觀行人證法界

能離二相及無二

若離於心知無餘

由此即見心非有

智人見此二不有

得住無二真法界

由無分別智慧人

恒平等行遍一切

染衣稠密過聚性

遣滅如藥能除毒

佛說正法善成立

安心有相於法界

已知憶念唯分別

功德海岸智人至

攝大乘論入因果勝相第四

如此已說入應知勝相云何應知入因果勝  
相由六波羅蜜謂陀那尸羅羸提毗梨耶持  
訶那般羅若波羅蜜云何由六波羅蜜得入  
唯識復云何六波羅蜜成入唯識果此正法  
內有諸菩薩不著富樂心於戒無犯過心於  
苦無壞心於善修無懶惰心於此散亂因中  
不住著故常行一心如理簡擇諸法得入唯  
識觀由依止六波羅蜜菩薩已入唯識地次  
得清淨信樂意所攝六波羅蜜是故於此中

間設離六波羅蜜加行功用由信樂正說愛  
重隨喜願得思惟故恒無休息行故修習六  
波羅蜜究竟圓滿此中說偈

修習圓白法

能得利疾忍

菩薩於自乘

甚深廣大說

覺唯分別故

得無著智故

是樂信清淨

名清淨意地

菩薩在法流

前後見諸佛

已知菩提近

無難易得故

何故波羅蜜唯有六數為安立能對治六種

惑障故為一切佛法生起依處故為隨順成

熟一切衆生依止故為對治不發行心因故

立施戒二波羅蜜不發行心因者貪著財物

及以室家若已發修行心為對治退弱心因

故立忍精進二波羅蜜退弱心因者謂生死  
衆生違逆若事長時助善法加行疲怠若已  
起發行及不退弱心爲對治壞失心因故立  
定慧二波羅蜜壞失心因者謂對亂邪智是  
故爲對治六種惑障立波羅蜜有六數爲一  
切佛法生起依處故者前四波羅蜜是不散  
亂因次一波羅蜜是不散亂體由依止此不  
散亂故能如實覺了諸法真理一切如來正  
法皆得生起是故爲一切佛法生起依處立  
波羅蜜有六數爲隨順成熟一切衆生依止  
故者由施波羅蜜利益衆生由戒波羅蜜不  
損惱衆生由忍波羅蜜能安受彼毀辱不起

報怨心由精進波羅蜜生彼善根滅彼惡根  
由此利益因一切衆生皆得調伏次彼心未  
得寂靜爲令寂靜已得寂靜爲令解脫故立  
定慧二波羅蜜由此六度菩薩善教衆生故  
得成熟是故爲道順成熟一切衆生依止立  
波羅蜜有六數由如此義是故應知成五波  
羅蜜有六數

此六波羅蜜相云何可見由六種最勝六波  
羅蜜通相有六一由依止無等謂依止無上  
菩提心起二由品類無等謂一波羅蜜略  
說皆有三口菩薩皆具修行三由行事無等  
謂安樂利益一切衆生事菩薩所行諸度皆

爲成此二事故四由方便無等謂無分別智  
菩薩所行諸度皆是無分別智所攝故五由  
迴向無等謂迴向無上菩提菩薩所行諸度  
決定轉趣一切智果故六由清淨無等謂惑  
智二障永滅無餘菩薩所行諸度分分除二  
障乃至皆盡故施卽是波羅蜜波羅蜜卽是  
施耶有是施非波羅蜜有是波羅蜜非施有  
是施是波羅蜜有非施非波羅蜜如施中四  
句應知餘度亦有四句  
云何說六波羅蜜如此次第前前波羅蜜隨  
順次生後後波羅蜜故復次前前波羅蜜由  
後後波羅蜜所清淨故



依何義立六度名此義云何可見於一切世  
間聲聞獨覺施等善根中最勝無等故以能  
到彼岸故是故通稱波羅蜜能破滅恡惜嫉  
妬及貧窮下賤苦故稱施復得爲大富主及  
能引福德資糧故稱那能寂靜邪戒及惡道  
故名尸復能令得善道及三摩提故稱羅能  
滅除瞋恚及忿恨心故名羸復能生自他平  
和事故稱提能滅除嬾惰及諸惡法名毗梨  
復行不放逸生長無量善法故稱耶能滅除  
散亂故名持訶及能引心令住內境故稱那  
能滅一切見行能除邪智故名般羅能緣真  
相隨其品類知一切法故稱若

去何應知諸波羅蜜修習若略說應知修習  
有五種一修加行方法二修信樂三修思惟  
四修方便勝智五修利益他事此中前四修  
應知如前利益他事修者諸佛無功用心不  
捨如來事修習諸波羅蜜至圓滿位中更修  
諸波羅蜜

復次思惟修習者愛重隨喜願得思惟六意  
攝所修六意者一廣大意二長時意三歡喜  
意四有恩德意五大志意六善好意廣大意  
者若菩薩若干阿僧祇劫能得無上菩提以  
如此時爲一剎那剎那菩薩於此時中剎那  
剎那常捨身命及等恒伽沙數世界滿中七

寶奉施供養如來從初發心乃至入任究竟  
清涼菩提是菩薩施意猶不滿足如此多時  
刹那刹那滿三千大千世界熾火菩薩於中  
行任坐卧爲四威儀離一切生生之具戒忍  
精進三摩提般若心菩薩恒現前修乃至入  
任究竟清涼菩提菩薩戒忍等意亦不滿足  
是無厭足心是名菩薩廣大意若菩薩從初  
發心乃至成佛不捨無厭足心是名菩薩長  
時意若菩薩由六波羅蜜所作利益他事常  
生無等歡喜衆生得益其心歡喜所不能及  
是名菩薩歡喜意若菩薩行六波羅蜜利益  
衆生已見衆生於我有次恩德不見自身於

彼有恩是名菩薩有恩德意若菩薩從六波羅蜜所生功德善根施與一切衆生以無著心迴向爲令彼得可愛重果報是名菩薩大志意若菩薩所行六波羅蜜功德善根令一切衆生平等皆得爲彼迴向無上菩提是名菩薩善好意由此六意所攝愛重思惟菩薩修習若菩薩隨喜無量菩薩修加行六意所生功德善根是名菩薩六意所攝隨喜思惟若菩薩願一切衆生修行六意所攝六波羅蜜及願自身修行六意所攝六波羅蜜修習加行乃至成佛是名菩薩六意所攝願得思惟若人得聞六意所攝菩薩思惟修習生一

念信心是人則得無量無邊福德之聚諸惡業障壞滅無餘若人但聞尚得無量無邊福德何況菩薩盡能修行

云何應知諸波羅蜜差別由各有三品知其差別施三品者一法施二財施三無畏施戒三品者一守護戒二攝善法戒三攝利衆生戒忍三品者一他毀辱忍二安受苦忍三觀察法忍精進三品者一勤勇精進二加行精進三不下難壞無足精進定三品者一安樂任定二引神通定三隨利他定般若三品者一無分別加行般若二無分別般若三無分別後得般若

云何應知諸波羅蜜攝義一切善法皆入六波羅蜜攝以爲彼性故彼是六波羅蜜所流果故一切善法所隨成故

云何應知諸波羅蜜所對治攝一切惑以爲彼性故爲彼生因故爲彼所流果故

云何應知諸波羅蜜功德若菩薩輪轉生死大富位自在所攝大生所攝大眷屬徒衆所攝大資生業事成就所攝無疾惱少欲等所攝一切工巧明處聰慧所攝如意無失富樂利益衆生爲正事故菩薩修行六度功德乃至入任究竟清涼菩提恒在不異故云何應知諸波羅蜜更互相顯世尊或以施

名說諸波羅蜜或以戒名或以忍名或以精  
進名或以定名或以般若名說諸波羅蜜如  
來以何意作如此說於波羅蜜修行方便中  
一切餘波羅蜜皆聚集助成故此即如來說  
意此中說鬱陀那偈

位數相次第 名修差別攝 對治及功德

手顯諸度義

攝大乘論卷中

九

曰

枉紆往反鞞步迷反締田之反練下而者反若寂靜地可

修行也藤徒登反拈先擊反分俱脰下稱遲

一脰此云羸提通呼初眼初鷹二反忍辱

